



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDICIAL

13 Juñu 2016

Komunikadu Imprensa

Parlamentu Nasionál

**JSMP espera Komisaun A Parlamentu Nasionál konsidera hanoin
no rekomendasaun sira hosi sosiedade sivil nian kona-ba Proposta
Lei Pakote ba Rai**

Iha 8 no 9 Juñu 2016, JSMP hamutuk ho membru sosiedade sivil sira seluk halo audénsia públika ho Komisaun A Parlamentu Nasionál (PN). Audénsia públika ne'e nu'udar parte ida hosi konsulta públika ne'ebé ho intensaun atu rona diretamente perspetiva sosiedade sivil nian kona-ba Proposta Lei Pakote ba Rai ne'ebé konstitui Lei Titulár ba Sasán Imóvel, Lei Expropriasaun Lei Baze ba Ordenamentu Teritóriu.

Iha audénsia ne'e, antes hato'o observaun kona-ba propsota lei sira ne'e, JSMP mós hato'o nia apresiasaun no agradesimentu ba Komisaun A PN relasiona ho konsiderasaun ba rekomendasaun hosi JSMP no AJAR ba iha Lei Indultu ne'ebé Prezidenti Repúblika promulga ona.

“JSMP apresia tebes ho iniciativa Komisaun A ne'ebé kontinua involve partisipasaun sosiedade sivil iha prosesu halo lei no espera katak mekanizmu hanesan ne'e sei nafatin kontinua atu esplora opiniaun públika hodi bele asigura qualidade ba lei sira ne'ebé Parlamentu produs,” dehan Diretór Ezekutivu JSMP, Luis de Oliveira Sampaio.

Asuntu importante ne'ebé JSMP rekomenda atu Parlamentu Nasionál, partikularmente Komisaun A atu bele tetu didiak molok aprova ezbosu lei sira ne'e, liu-liu Lei kona-ba Titulár ba Sasán Imóvel sira mak hanesan asuntu kona-ba “Direitu Anteriór” no “Sasán Domíniu Privadu Estadu nian”.

JSMP rekomenda atu tau iha konsiderasaun istória kona-ba prosesu hetan ka akizisaun ba propriedade ka sasán imóvel sira ne'e, partikularmente iha tempu koloniál Portugés no Indonézia.

JSMP husu ba PN atu prevee kedas artigu ida relaciona ho prosesu akizisaun ba sasán imóvel ne'ebé la liu hosi dalan ne'ebé pasifiku, justu no boa fé, nune'e, ema ne'ebé ho de'it uzukapiaun (ordináriu no espesiál) hetan direitu pose ba propriedade ne'e.

Iha parte sasán imóvel domínium privadu Estadu nian mós tenke konsidera istóriu okupasaun nian no objetivu luta ba ukun rasik-an. La'ós sasán imóvel hotu ne'ebé administrasaun koloniál sira husik hela, automatikamente reverta ba Estadu. Iha sasán imóvel sira ne'e balun ne'ebé sidadaun nasional balun okupa no uza hela ona, Estadu preziza rekoñese mós sira nia direitu.

JSMP mós hanoin katak importante atu inklui fila fali Kapítulu VIII ne'ebé trata asuntu despezu administrativu nian iha ezbosu lei Titulár ba Sasán imóvel no bele asegura katak lei ida-ne'e konstitui instrumentu sira direitu umanu ne'ebé konsagra iha Konvensaun Internasionál ne'ebé Timor-Leste ratifika no Konstituisaun RDTL rasik. Ne'e signifika katak lei ne'e tenke asegura despezu administrativu ne'ebé respeitu dignidade no direitu umanu sidadaun sira nian.

Preokupasaun hirak ne'ebé JSMP hato'o iha audénsia 9 Juñu 2016 kona-ba ezbosu Lei Baze ba Ordenamentu Teritóriu nian mak prinsipalmente kona-ba alineaia i) Artigu 12 kona-ba konsesaun/fó partikular/privadu sira atu uza no explora rai ne'ebé tama ba domínium públiku.

JSMP rekomenda atu prevee kedas alineaia ida kona-ba rai sira ne'ebé bele fó ba privadu sira uza no explora no balun ne'ebé la bele, liu-liu fatin ka rai protejidu sira. Nune'e bele proteje rai sira ne'e nia valór istóriu, kulturál no nia-orijinalidade.

Iha audénsia ne'e, aleinde halo komentáriu, JSMP mós prepara paraser eskrita ida ne'ebé konstitui hosi komentáriu jerál no analiza ba artigu.

Atu hatene kle'an informasaun kona-ba submisaun JSMP nian kona-ba analiza, komentariu no observasaun krítiku, kona-ba rezime espesial ba definisaun na'in ba sasán imovel no lei ba espropriasaun, bele asesu iha website JSMP: <http://jsmp.tl/wp-content/uploads/2013/03/Submisaun-Pakote-Lei-ba-Rai-ba-PN-versaun-final-2016-2.pdf>

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Telefone: 3323883 |77295795

www.jsmp.tl

Facebook: www.facebook.com/timorleste.jsmp

Twitter: @JSMPtl